



# STINAPA TA INFORMA

## E MOTOR BERDE

Boneiru ta un di e islanan ku ménos poblashon den Karibe. Esei ta riparabel ora bo ta kore rònt. Ora bo bai direkshon sùit, pasa e saliñanan, kasi bo no ta topa otro hende. Parti nort ku pariba, manera ku bo baha for di kaminda asfaltá ta mesun kos. Ta unda bo ta haña esei ainda? Por ta bèrdat ku tráfiiko a bira un tiki mas drùk, pero te ainda no tin lus di tráfiiko. Boneiru ta un isla trankil, por ta pa sierto hende e por ta laf, pero tin hopi hende ku sí ta gosa di e trankilidat. Ta tiki isla tin den Karibe ku tin un ambiente relahá manera esun di nos i ku tambe tin lugánan bunita asina manera Lac i Sorobon. Nan ta úniko. E trankilidat i e kolónan di e awa, hopi biaha ta pone turistanan ku yega einan pa promé biaha bisa ku nan no tabata sa ku tabata eksistí un sitio bunita asina na mundu. Pa aña un 60.000 turista ta drenta na aeropuerto Flamingo. Nan no ta bin pa e playanan ku santu blanku, pasobra esei bo por kasi bisa ku no tin. Mayoría di e turistanan ta sambuyadó, pasobra Boneiru ta hopi haltu den e lista mundial di sitionan bunita pa buseo. E reputashon ei Boneiru por a haña dor di un maneho avansá di naturalesa. Ya kaba for di 1979 Boneiru i Klein Bonaire su laman for di kosta te ku 60 meter di profundidat ta un sanktuarío di naturalesa. I e ta un ehèmpel pa mundu. Ta bon pa pensa riba esei ora bo ta bai landa òf piska. Bo no ta 'zomaar' den laman, nò, bo ta landa den un sanktuarío di naturalesa. Turismo ta e motor di ekonomia di Boneiru. Lokual ta hasi nos renombrá ta e trankilidat i virginidat riba awa i e naturalesa úniko bou di awa. Ta p'esei turistanan ta bini, no pa un lugá drùk ku un bida noktumo di un siudat grandi. Esun ku ta buska esei por skohe for di suficiente otro isla den Karibe. E naturalesa di Boneiru ta e 'motor bèrdè' di nos ekonomia. Si bo mishi ku e karakter úniko aki, bo ta tira stenslag den e motor aki. Pa prevení esei, ya pa hopi aña e lema di desaroyo di Boneiru ta: kresementu ku mantenshon di naturalesa i kultura. Esei kemen den práktika ku kresementu ekonómiko enbèrdat ta importante. Pero no 'a todo kosto'. E naturalesa úniko i e kultura lokal no mester bini bou di preshon. Si nos pèrdè e ekilibrio Boneiru ta pèrdè e "galiña kuta pone e webu di oro". Laga nos perkurá awor pa nos naturalesa, di moda ku nos yunan tambe por disfrutá di nan futuro. Skribí pa *Trix van Bennekom*, tradusí pa *Marcel Nahr*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**